



**NOGOMETNI/FUDBALSKI SAVEZ
BOSNE I HERCEGOVINE**

**PRAVILNIK
o statusu trenera**

Sarajevo, novembar/studeni 2023. godine

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor Nogometnog/Fudbalskog saveza Bosne i Hercegovine, na sjednici održanoj dana 14.11.2023. godine godine d o n o s i

P R A V I L N I K

o statusu trenera

I - OPŠTE ODREDBE

Član 1. **(Opšte odredbe)**

(1) Ovim Pravilnikom se na jedinstven način reguliše: pojam trenera, vrste trenerskih diploma, licenci i sertifikata, minimalan broj trenera za svaku selekciju, minimum trenerskih kvalifikacija, evidencija i registracija trenera, ugovorni odnosi između trenera i kluba i ostvarivanje ugovornih prava te ostala pitanja od značaja za status trenera u nogometnoj/fudbalskoj organizaciji BiH.

Član 2. **(Definicije pojmova trener i nadležni savez)**

(1) Pod pojmom trener podrazumijeva se lice koje posjeduje jednu od navedenih trenerskih diploma sa validnom licencom ili nacionalnim sertifikatom trenera, kako slijedi:

- UEFA PRO diploma i licenca,
- UEFA A diploma i licenca,
- UEFA B diploma i licenca,
- UEFA C diploma i licenca,
- UEFA A Elite Youth diploma i licenca,
- UEFA B Youth diploma i licenca,
- UEFA B Futsal diploma i licenca,
- UEFA A GK diploma i licenca,
- UEFA B GK diploma i licenca,
- UEFA A fitnes diploma i licenca
- UEFA B fitnes diploma i licenca,
- Nacionalni sertifikat za Tehničkog/Sportskog direktora,
- Nacionalna C diploma i licenca,
- Nacionalna D diploma i licenca,
- Nacionalni GK sertifikat,
- Nacionalni futsal sertifikat,
- UEFA Grassroots leader.

(2) Pored Nogometnog/Fudbalskog saveza BiH (u daljem tekstu: Savez), pod pojmom nadležni savezi, podrazumijevaju se: Opštinski fudbalski savezi (OFS), Područni Fudbalski savezi (PFS) i Fudbalski savez Republike Srpske (FS RS) kao i kantonalni/županijski savezi (K/Ž S) i Nogometni savez Federacije BiH (NS FBiH) koji sprovode takmičenja iz svoje nadležnosti na teritoriji Bosne i Hercegovine.

II – TRENERSKE KVALIFIKACIJE

Član 3.

(Trenerske kvalifikacije za takmičenja u organizaciji NS/FS BiH)

(1) Za klubove koji sa svojim takmičarskim selekcijama učestvuju u sistemu takmičenja koje organizuje NS/FS BiH, minimalne stručne kvalifikacije na zvaničnim kup i prvenstvenim utakmicama utvrđuju se kako slijedi:

a) Premijer liga BiH (seniori):

1. Tehnički/Sportski direktor – Nacionalni certifikat, od sezone 2026-2027. godine,
2. Glavni trener – UEFA PRO licenca,
3. Pomoćni trener – UEFA A licenca,
4. Trener golmana – UEFA A GK licenca od sezone 2024-2025. godine,
5. Kondicioni trener – UEFA B fitness licenca od sezone 2025-2026. godine, a UEFA A fitness licenca od sezone 2026-2027. godine.

b) Premijer omladinska liga BiH (“U-19” i “U-17”):

1. Glavni trener – UEFA A licenca, a od sezone 2024-2025.godine UEFA A Elite Youth licenca,
2. Pomoćni trener – UEFA B licenca, a od sezone 2025-2026.godine UEFA B Youth licenca,
3. Trener golmana – UEFA B GK licenca od sezone 2025-26.godine a UEFA A GK licenca od sezone 2026-2027.godine (jedan za U17 i U19),
4. Kondicioni trener – UEFA B fitness od sezone 2026-2027.godine a UEFA A fitness licenca od sezone 2027-2028 (može jedan za U17 i U19).

c) Premijer omladinska liga BiH (“U-15” i “U-13”):

1. Glavni trener – UEFA B licenca, a od sezone 2025-2026.godine UEFA B Youth licenca,
2. Pomoćni trener – UEFA B licenca,
3. Trener golmana – UEFA B GK licenca od sezone 2026-2027.godine (može jedan za U15 i U13),
4. Kondicioni trener – UEFA B fitness od sezone 2026-2027.godine (može jedan za U15 i U13).

d) Premijer ženska liga BiH (seniorke):

1. Glavni trener – UEFA B licenca, a od sezone 2024-2025.godine UEFA A licenca,
2. Pomoćni trener – UEFA C licenca, a od sezone 2025-2026.godine UEFA B licenca,
3. Trener golmana – Nacionalni GK sertifikat od sezone 2025-2026.godine, a od sezone 2026-2027.godine, UEFA B GK licenca,
4. Kondicioni trener – UEFA B fitness licenca od sezone 2026-2027.godine.

e) Premijer ženska omladinska liga BiH (“U-17”):

1. Glavni trener – UEFA C licenca a od sezone 2025-2026.godine UEFA B licenca a od sezone 2026-2027.godine UEFA B Youth licenca,
2. Pomoćni trener – UEFA C licenca a od sezone 2026-2027. godine UEFA B licenca.

f) Premijer futsal liga BiH (seniori):

1. Glavni trener – UEFA B futsal licenca,

2. Pomoćni trener – Nacionalni futsal sertifikat.

g) Premijer futsal omladinska liga BiH (selekcija “U-19”):

1. Glavni trener – Nacionalni sertifikat futsal trenera.

Član 4.

(Trenerske kvalifikacije za takmičenja u organizaciji FSRS i NS FBiH)

(1) Za klubove koji sa svojim takmičarskim selekcijama učestvuju u sistemu takmičenja koje organizuje FSRS i NS FBiH, minimalne stručne kvalifikacije na zvaničnim kup i prvenstvenim utakmicama utvrđuju se kako slijedi:

a) Prva liga FSRS i Prva liga NS FBiH (seniori):

1. Glavni trener – UEFA A licenca, a od sezone 2025-2026. godine UEFA PRO licenca
2. Pomoćni trener – UEFA B licenca, a od sezone 2025-2026. godine UEFA A licenca
3. Trener golmana – Nacionalni GK sertifikat od sezone 2024-2025.godine a od sezone 2025-2026. godine, UEFA B GK licenca,
4. Kondicioni trener – UEFA B Fitnes licenca od sezone 2026-2027 godine.

b) Druga liga FSRS i Druga liga NS FBiH (seniori):

1. Glavni trener – UEFA B licenca, a od sezone 2026-2027.godine UEFA A licenca,
2. Pomoćni trener – UEFA C licenca, a od sezone 2026-2027.godine UEFA B licenca.

c) Regionalna liga FSRS (seniori):

1. Glavni trener – UEFA C licenca, a od sezone 2026-2027.godine UEFA B licenca.

d) Omladinske lige u organizaciji FS RS i NS FBiH (“U-19” i “U-17”):

1. Glavni trener – UEFA B licenca a od sezone 2026-2027. godine, UEFA B Youth licenca, a od sezone 2027-2028.godine UEFA A Elite Youth licenca,
2. Pomoćni trener – UEFA C licenca a od sezone 2025-2026.godine UEFA B licenca a od sezone 2027-2028.godine UEFA B Youth licenca.

e) Omladinske lige u organizaciji FSRS i NS FBiH (U15 i U13):

1. Glavni trener – UEFA C licenca a od sezone 2025-2026.godine UEFA B licenca a od sezone 2026-2027.godine UEFA B Youth licenca.

f) Prva liga za žene u organizaciji FS RS i NS FBiH (seniorke):

1. Glavni trener – UEFA C licenca, a od sezone 2025-2026.godine UEFA B licenca.
2. Pomoćni trener – UEFA C licenca, od sezone 2025-2026.godine UEFA B licenca.
3. Trener golmana – Nacionalni GK sertifikat, od sezone 2025-2026. godine a od sezone 2027-2028.godine UEFA B GK licenca.

g) Prva futsal liga FSRS i Prva futsal liga NS FBiH (seniori):

1. Glavni trener – Nacionalni futsal sertifikat a od sezone 2025-2026. godine UEFA B Futsal licenca,
2. Pomoćni trener – Nacionalni sertifikat trenera Futsala od sezone 2025-2026.godine.

Član 5.
(Trenerske kvalifikacije za takmičenja u organizaciji kantonalnih, područnih i opštinskih saveza)

(1) Klubovi koji sa svojim takmičarskim selekcijama učestvuju u sistemu takmičenja koje organizuju kantonalni savezi u NS FBiH a područni i opštinski savezi u FSRS, moraju imati minimalno po jednog trenera (glavni trener) za svaku takmičarsku selekciju.

(2) Minimalne stručne kvalifikacije za glavnog trenera na zvaničnim kup i prvenstvenim utakmicama utvrđuju se kako slijedi:

1. Seniorski fudbal – UEFA C licenca, a od sezone 2026-2027.godine UEFA B licenca.
2. Veteranski fudbal – UEFA C licenca,
3. Omladinski fudbal: “U-15”, “U-17” i “U-19” – UEFA C licenca, a od sezone 2026-2027.godine UEFA B licenca
4. Dječiji fudbal: “U-9”, “U-11” i “U13”– Nacionalna C licenca, a od sezone 2025-2026. godine UEFA C licenca
5. Školski fudbal – UEFA Grassroots leader,
6. Fudbalski festivali – UEFA Grassroots leader.

III – REGISTRACIJA TRENERA – OBAVEZE KLUBOVA

Član 6.
(Obaveze klubova)

(1) Fudbalski/nogmetni klubovi (u daljem tekstu klubovi) svih nivoa takmičenja u BiH, moraju izvršiti registraciju svojih trenera u COMET sistem, pred početak svake takmičarske sezone u nadležnim savezima za prvenstvena i kup takmičenja za koja su se klubovi prijavili.

(2) Klub može podnijeti zahtjev nadležnom savezu za registraciju samo onog trenera koji ima validnu trenersku kvalifikaciju spomenutu u članu 2. stavu (1) ovog Pravilnika.

(3) Pred početak svake takmičarske sezone, klub je obavezan podnijeti zahtjev za registraciju trenera za nastupajuću takmičarsku sezonu, nadležnom savezu u čijoj se organizaciji takmiče selekcije kluba. Za vođenje na takmičenju, svaka selekcija mora imati trenera sa odgovarajućom minimalnom stručnom kvalifikacijom u skladu sa ovim Pravilnikom.

(4) Nakon dobijanja obavjesti od nadležnog saveza, o održavanju seminara za registraciju trenera, za nastupajuću takmičarsku sezonu, u cilju registracije svojih trenera, klubovi su dužni dostaviti nadležnom savezu slijedeću dokumentaciju:

1. Zahtjev za registraciju trenera (preuzeti sa web stranice NS/FS BiH), čitko popunjen, ovjeren i potpisan od strane ovlaštenog lica u klubu,
2. Kopiju diplome i validne licence ili sertifikata koji se traži za vođenje i treniranje te selekcije,
3. Kopiju odgovarajućeg ugovora između kluba i trenera, (od sezone 2026-2027.godine)
4. Dokaz o članstvu trenera u nadležnoj trenerskoj organizaciji, (od sezone 2026-2027. godine) za nastupajuću takmičarsku sezonu i
5. Dvije fotografije (formata kao za ličnu/osobnu kartu).

(5) Za trenere strane državljanke, pored navedene dokumentacije iz prethodnog stava, klub je dužan dostaviti i dozvolu za rad u BiH, izdatu od nadležnih institucija u BiH.

IV – REGISTRACIJA TRENERA – OBAVEZE NADLEŽNIH SAVEZA

Član 7.

(Obaveze nadležnih saveza pred početak takmičarske sezone)

(1) Nadležni savezi su dužni da pred početak svake takmičarske sezone, organizuju jednodnevni stručni seminare za registraciju trenera, za svaku takmičarsku selekciju, na svim nivoima takmičenja koji se takmiče u organizaciji nadležnog saveza.

(2) Pred početak svake takmičarske sezone, nadležni savezi su dužni blagovremeno poslati obavjest svim klubovima čije se selekcije takmiče u organizaciji nadležnog saveza o datumu, mjestu i vremenu održavanja seminara za registraciju trenera. U obavjesti treba da budu navedena kompletna dokumentacija koja se mora dostaviti nadležnom savezu za svakog trenera kojeg treba registrovati u COMET sistemu, kako bi vodio svoju selekciju na prvenstvenim i kup utakmicama u spomenutoj takmičarskoj sezoni.

(3) Prisustvo seminaru za registraciju trenera je obavezno za sve trenere koji će voditi svoje selekcije u narednoj takmičarskoj sezoni u organizaciji nadležnih saveza. Evidenciju o prisustvu trenera seminaru će voditi nadležni savezi.

(4) Nadležni savezi su dužni da, blagovremeno prikupe zahtjeve za registraciju trenera od klubova i da ih detaljno pregledaju. Nakon provjere, zaprimljeni zahtjev potpisuje odgovorno lice nadležnog saveza i ovjerava pečatom. Ako podaci koje je klub dostavio za svoje trenere nisu potpuni ili tačni, nadležni savez će od kluba zatražiti dopunu istih.

(5) Nadležni savez će prikupljene zahtjeve za registraciju trenera donijeti na seminar koji je organizaovao gdje će stručni saradnik Edukacionog centra koristeći bazu podataka svih trenera, izvršiti provjeru ispravnosti registracije trenera.

(6) Trenere sa validnim zahtjevom za registraciju trenera, nakon provjere stručnog saradnika Edukacionog centra, u COMET informacioni sistem unose ovlaštene osobe nadležnih saveza za klubove koji se takmiče u njihovoj organizaciji. Potrebno je da svaki nadležni savez odredi odgovornu osobu koja će dobiti šifru za COMET.

Član 8.

(Registracija trenera u toku takmičarske sezone)

(1) Ako u toku takmičarske sezone dođe do promjene trenera iz bilo kojih razloga, moguće je izvršiti registraciju trenera u naknadnom postupku.

(2) Klub je dužan da pored zahtjeva za registraciju trenera sa kompletnom dokumentacijom koja se traži, dostavi nadležnom savezu na memorandumu kluba, odluku ili rješenje nadležnog organa kluba da umjesto prethodnog trenera angažuje novog trenera na istoj poziciji.

V – REGISTRACIJA TRENERA – OBAVEZE EDUKACIONOG CENTRA NS/FS BIH

Član 9. (Evidencija trenera)

(1) Edukacioni centar je dužan da vodi jedinstvenu bazu podataka u kojoj evidentira i sakuplja svu neophodnu dokumentaciju i podatke o svakom treneru, kako onih čija je edukacija u toku, tako i onih koji su završili neku od trenerskih licenci u Centru, NS/FS BiH, kao bi u svakom trenutku mogli provjeriti tačnost podataka u zahtjevu za registraciju trenera.

Član 10. (Registracija aktivnih trenera)

(1) Stručni saradnik Edukacionog centra je dužan da dođe na seminar za registraciju trenera, koji organizuje nadležni savez, provjeri podatke i dokumentaciju sa zahtjevom za registraciju trenera, koristeći bazu podataka iz člana 9 ovog Pravilnika i potvrdi tačnost navedenih podataka, kako bi ovlaštene osobe nadležnih saveza mogle da unose podatke u COMET i time izvrše registraciju trenera.

(2) Stručni saradnik Edukacionog centra će unositi u Comet sistem podatke i registrovati trenere čiji se klubovi takmiče u organizaciji N/FS BiH.

(3) Registracija trenera u COMET informacionom sistem će u principu biti za nastupajuću takmičarsku sezonu. Period registracije trenera u COMET informacionom sistemu može biti i kraći od jedne takmičarske sezone ukoliko je datum validnosti licence kraći ili ako datum isticanja statusa trenera čija je edukacija u toku bude kraći od datuma završetka takmičarske sezone.

(4) Prilikom pregleda prispjelih zahtjeva za registraciju trenera, nadležni savezi mogu zatražiti od klubova da dopune dokumentaciju ako primjete da nešto ne dostaje.

(5) Edukacioni centar će u sistemu licenciranja uzimati u obzir ravnopravno sve trenerske kvalifikacije stečene u zemljama potpisnicama UEFA Konvencije.

(5) Viša trenerska škola, smjer Fudbal/nogomet, je ekvivalentna Nacionalnoj C licenci i u sistemu daljnje edukacije ili u sistemu registracije trenera je priznata kao Nacionalna C licenca.

(6) Edukacioni centar će u saradnji sa nadležnim savezima realizovati stručni dio seminara za sve nivoe takmičenja, vodeći računa o programskim sadržajima koji će odgovarati nivou stručnih kvalifikacija koje posjeduju treneri koji slušaju seminar.

VI – REGISTRACIJA TRENERA ČIJA JE EDUKACIJA U TOKU

Član 11. (Treneri čija je edukacija u toku)

(1) Treneri koji pohađaju neki od kurseva iz člana 2. ovog Pravilnika, mogu ostvariti pravo registracije u COMET sistemu za isti nivo kursa koji pohađaju, na osnovu priložene potvrde da je njihova edukacija u toku, koju mogu dobiti u Edukacionom centru.

(2) Status trenera čija je edukacija u toku, mogu ostvariti polaznici kursa, od momenta kada odslušaju prvi dan predavanja na webinaru/modulu/rezidencijalnom bloku kursa koji pohađaju. Pravo korištenja statusa trenera čija je edukacija u toku prestaje, istekom

godinu dana, sa izuzetkom UEFA PRO kursa gdje se to pravo prenosi do isteka dvije godine, od od početka edukacije na tom kursu.

(3) U cilju dokazivanja statusa trenera čija je edukacija u toku potrebno je dostaviti potvrdu ili uvjerenje iz Edukacionog centra NS/FS BiH ili drugih saveza potpisnica UEFA trenerske konvencije, sa tačnim datumom početka edukacije na kursu.

VII – UGOVORI

Član 12. (Ugovori trenera i kluba)

(1) Trener i nogometni/fudbalski klub svih nivoa takmičenja moraju zaključiti odgovarajuće ugovore na osnovu ukazane potrebe i slobodno izražene volje obje ugovorne strane.

(2) Ugovori o radu na određeno ili na neodređeno vrijeme zaključeni između trenera i klubova će uživati pravnu zaštitu pred organima opštinskih, kantonalnih, područnih i entitetskih saveza te organima NS/FS BiH.

(3) Ugovori između trenera i klubova koji nisu ugovori o radu na određeno ili na neodređeno vrijeme će uživati pravnu zaštitu pred nadležnim redovnim sudovima ili arbitražom čiju su nadležnost ugovorne strane utvrdile ugovorom.

Član 13. (Elementi ugovora)

(1) Ugovor mora minimalno sadržavati slijedeće elemente:

- Tačne opšte podatke obje strane potpisnice ugovora,
- Datum zaključivanja ugovora,
- Predmet ugovora,
- Period na koji se ugovor zaključuje,
- Iznos plaće/naknade,
- Obaveze trenera prema klubu,
- Obaveze kluba prema treneru,
- Potpise ugovornih strana.

(2) Prilikom sklapanja ugovora između trenera i kluba, poželjno je u ugovoru precizirati ugovorne obaveze obje strane u slučaju prijevremenog raskida ugovora, odnosno ugovorne obaveze koje proističu u slučaju jednostranog raskida ugovora.

(3) Ako su prilikom zaključenja ugovora bile korištene usluge posrednika, isto u ugovoru mora biti naznačeno, uz navođenje imena i prezimena posrednika.

(4) Ove odredbe jednako se primjenjuju na trenere nogometa/fudbala i futsala.

Član 14. (Valjanost ugovora)

(1) Valjanost ugovora ne može biti uslovljena:

- a) dobivanjem radne dozvole ili dozvole boravka,
- b) zahtjevom za posjedovanje određene trenerske licence ili
- c) drugim zahtjevima administrativne ili regulatorne prirode.

(2) Klubovi u postupku zapošljavanja moraju postupati uz dužnu pažnju kako bi osigurali da trener ispunjava sve potrebne uslove kako bi bio zaposlen (npr. da posjeduje potrebnu trenersku licencu) te kako bi uredno izvršavao svoje obaveze.

Član 15. (Poštivanje ugovora)

(1) Ugovor potpisan između kluba i trenera može prestati samo po isteku njegovog trajanja ili međusobnim sporazumom.

Član 16. (Raskid ugovora zbog opravdanog razloga)

(1) Kad postoji opravdani razlog, svaka strana može raskinuti ugovor bez plaćanja naknade drugoj ugovornoj strani.

(2) Svako ponašanje jedne ugovorne strane s ciljem prisiljavanja druge ugovorne strane na raskid ugovora ili izmjene odredaba ugovora, daje drugoj ugovornoj strani pravo na raskid ugovora iz opravdanog razloga.

(3) U slučaju da klub nezakonito propusti isplatiti treneru najmanje dvije mjesečne plaće na njihove datume dospijeca, smatrat će se da trener ima opravdan razlog za raskid ugovora, pod uslovom da je dužnika (klub) pisanim putem upozorio o neplaćanju i dao mu rok od najmanje 15 (petnaest) dana u kojem je klub dužnik trebao u potpunosti ispuniti svoje finansijske obaveze.

(4) Ako isplata plaće trenera ne dospijeva po mjesečnoj osnovi, u obzir se uzima proporcionalna vrijednost za dva mjeseca. Zakašnjela uplata iznosa koji je jednak iznosu za najmanje dva mjeseca također se smatra opravdanim razlogom da trener raskine svoj ugovor, pod uslovom da trener postupi u skladu sa stavom (3) ovog člana, odnosno, obavijesti klub o neplaćanju i ostavi naknadni rok za plaćanje.

(5) Ugovorne odredbe kojima se klubu odobrava dodatno vrijeme da treneru plati iznose koji su dospjeli prema odredbama ugovora neće biti priznate.

Član 17. (Posljedice raskida ugovora bez opravdanog razloga)

(1) U svim slučajevima raskida ugovora bez opravdanog razloga, strana koja raskida ugovor plaća drugoj strani naknadu.

(2) Osim ako je drugačije predviđeno ugovorom, naknada koja pripada treneru u slučaju raskida ugovora od strane kluba bez opravdanog razloga izračunava se kako slijedi:

- a) U slučaju da trener nije potpisao novi ugovor nakon raskida svog prijašnjeg ugovora, kao opšte pravilo, naknada je jednaka preostaloj vrijednosti ugovora koji je raskinut.
- b) U slučaju da je trener potpisao novi ugovor do trenutka donošenja odluke o raskidu, vrijednost novog ugovora za razdoblje koje odgovara vremenu koje je preostalo prema raskinutom ugovoru oduzima se od preostale vrijednosti ugovora koji je raskinut (umanjena naknada). U slučaju raskida ugovora zbog dospjelih obaveza, pored umanjene naknade, trener ima pravo na iznos koji odgovara trima mjesečnim plaćama (dodatna naknada). U slučaju vanrednih okolnosti, dodatna naknada može biti povećana do iznosa od najviše šest

mjesečnih plaća. Sveukupna naknada ne može prelaziti preostalu vrijednost ugovora koji je raskinut.

- c) U slučaju potpisivanja kolektivnog ugovora između predstavnika poslodavaca i zaposlenika, primjenjivat će se odredbe tog kolektivnog ugovora.

(3) Osim ako je drugačije predviđeno ugovorom, naknada koja pripada klubu za raskid bez opravdanog razloga od strane trenera izračunava se na osnovu štete i troškova koji su nastali klubu u vezi sa raskidom ugovora, posvećujući dužnu pažnju naročito na preostalu naknadu i druge pogodnosti koje pripadaju treneru prema raskinutom ugovoru i/ili bilo kojem novom ugovoru, naknade i troškove koje je platio i imao bivši klub (koji se amortiziraju kroz trajanje ugovora), te načelo posebnosti sporta.

(4) Pravo na naknadu ne može se prenijeti na treću stranu.

(5) Svaka osoba koja podliježe odredbama Statuta FIFA i NS/FS BiH i koja djeluje na način kojim podstiče na raskid ugovora između trenera i kluba, bit će kažnjena prema odredbama Disciplinskog pravilnika NS/FS BiH.

Član 18. (Dospjele obaveze)

(1) Klubovi su dužni da ispunjavaju svoje finansijske obaveze prema trenerima u skladu sa ugovorom utvrđenim uslovima.

(2) Svaki klub za kojeg se utvrdi da je zakasnio s plaćanjem dospelje obaveze više od 30 (trideset) dana bez "*prima facie*" ugovorne osnove, može biti kažnjen u skladu sa stavom (4) ovog člana.

(3) Da bi se smatralo da klub ima dospjelih obaveza u smislu ovog člana, povjerilac (trener), mora pisanim putem upozoriti dužnika (klub) o neplaćanju i dati mu rok od najmanje deset dana u kojem klub treba ispuniti svoje finansijske obaveze.

(4) Za nepoštivanje odredbi ovog člana, nadležni disciplinski organ će na prijedlog komisije za status i transfer igrača ili Komiteta za status i transfer igrača NS/FS BiH, izreći sankcije predviđene relevantnim disciplinskim pravilnikom.

(5) Uslovi iz ovog člana ne prejudiciraju plaćanje naknade u skladu sa članom 14. ovog Pravilnika.

Član 19. (Sporovi)

(1) Sporove u vezi sa ugovorima između trenera i klubova Premijer lige koji uživaju pravu zaštitu organa saveza, na zahtjev ugovornih strana, u prvom stepenu rješavaju komisije za status i transfer igrača nadležnog saveza koji je izvršio registraciju trenera, a po žalbi u drugom stepenu rješava Komitet za status igrača i transfere NS/FS BiH.

(2) Sporove u vezi sa ugovorima između trenera i klubova nižih nivoa takmičenja koji uživaju pravu zaštitu organa saveza, na zahtjev ugovornih strana u prvom stepenu rješavaju komisije za status i transfer igrača nadležnog saveza koji je izvršio registraciju trenera, a u drugom stepenu po žalbi, komisija za status i transfer igrača entitetskih saveza.

(3) Nadležni organi neće rješavati sporove ako su prošle više od 2 (dvije) godine od

događaja koji je doveo do spora. U svakom pojedinačnom slučaju bit će ispitano da li je taj rok istekao.

(4) Nadležni prvostepeni organ dužan je donijeti odluku o zahtjevu u roku od 30 (trideset) dana od dana prijema zahtjeva. Odluka se dostavlja svim zainteresovanim stranama u pisanoj formi sa obrazloženjem.

(5) Protiv odluke prvostepenog organa, nezadovoljna strana može uložiti žalbu drugostepenom organu u roku od osam dana od dana prijema prvostepene odluke.

(6) Drugostepeni organ je dužan donijeti odluku po žalbi u roku do 30 (trideset) dana od dana podnošenja žalbe.

(7) Prvostepena odluka postaje pravosnažna ukoliko po isteku žalbenog roka nijedna od strana u sporu nije uložila žalbu protiv prvostepene odluke ili ako su se stranke pisanim putem odrekle prava na žalbu.

(8) Odluke drugostepenog organa su konačne te protiv istih nije dopuštena žalba.

Član 20. (Nadležnost za vođenje postupka)

(1) Prije pokretanja postupka, prvostepeni i drugostepeni organi utvrđuju svoju nadležnost za vođenje postupka.

(2) Ako se organ iz stava 1. ovog člana oglasi nenadležnim za vođenje postupka, obavezan je odmah, a najkasnije u roku do pet dana, predmet dostaviti nadležnom organu.

(3) Sukob nadležnosti organa rješava zajednički neposredno viši organ.

Član 21. (Odbacivanje zahtjeva/žalbe)

(1) Nadležni organ neće pokrenuti postupak, nego će svojom odlukom odbaciti zahtjev/žalbu zbog sljedećih razloga:

- a) Ako je zahtjev/žalba podnesena od neovlaštenog lica,
- b) Kad radnja opisana u zahtjevu/žalbi ne predstavlja povredu odredbi ovog Pravilnika,
- c) Ako se protiv lica iz određenih razloga ne može voditi postupak,
- d) Ako nadležni organ već vodi postupak ili je donio odluku,
- e) Ako je nastupila zastara,
- f) Ako zahtjev/žalba nije adekvatno taksirana.

(2) Protiv odluke iz stava 1. ovog člana žalba nije dozvoljena.

Član 22. (Rokovi)

(1) Rokovi predviđeni ovim Pravilikom ne mogu se produžavati.

(2) Rokovi u postupcima koji se vode zbog povreda ovog Pravilnika se računaju na sljedeći način:

- a) Ako se rok računa po danima, dan u kojem je izvršeno saopštavanje ili dostavljanje se ne računa u rok, nego se za početak roka računa prvi naredni dan.
- b) Na početak i tok roka ne utiče činjenica da su određeni dani neradni, ali ako posljednji dan roka pada u neradni dan, onda rok ističe sa protokom prvog narednog radnog dana.
- c) Kada je podnesak upućen putem pošte preporučenom pošiljkom, dan predaje pošti smatra se kao dan predaje onome kome je upućen.

(3) Ako je podnesak koji je vezan za rok, zbog neznanja ili očigledne greške podnosioca predat ili upućen nenadležnom organu prije isteka roka, pa nadležnom organu stigne poslije isteka roka, smatraće se da je na vrijeme podnesen.

Član 23. (Takse)

(1) Taksa za vođenje postupka obavezno se plaća na:

- a) Sve zahtjeve za rješavanje spornog odnosa i
- b) Žalbe podnesene protiv odluka prvostepenog organa,

(2) Visine taksi utvrđuju se odlukama izvršnih odbora nadležnih saveza koji vrše registraciju trenera i entitetskih saveza te odlukom Izvršnog odbora NS/FS BiH i objavljuju u službenim glasnicima.

Član 24. (Troškovi postupka)

(1) U postupcima rješavanja sporova stranama u postupku neće se priznavati posebni troškovi, izuzev troškova vještačenja i taksi za vođenje postupka.

(2) U sporovima koji se vode po zahtjevu trenera, pored drugih dokaza može se provesti i vještačenje putem sudskog vještaka finansijske struke. Troškove vještačenja akontativno, kao avans, plaća strana koja predlaže vještačenje, s tim što će plaćanje troškova, po okončanju postupka, predstavljati obaveznu stranu koja nije uspjela u sporu.

(3) Ako strana koja predlaže vještačenje akontativno ne uplati troškove vještačenja u ostavljenom roku, postupak će se obustaviti.

(4) U rješavanju sporova pred organima saveza neće se priznavati troškovi advokata niti obračunavati kamate.

Član 25. (Dokazivanje)

(1) Teret dokazivanja je na podnosiocu zahtjeva ili žalbe, koji je dužan da organu koji vodi postupak dostavi sva relevantna dokazna sredstva.

(2) Za dokazna sredstva prihvaćće se relevantne isprave, svjedoci, vještaci te saslušanje stranaka ili njihove pisane izjave.

(3) Okrivljeni u toku postupka ima pravo zahtijevati da mu se predoče dokazi koji ga terete za povredu odredbi ovog Pravilnika.

(4) Izuzetno, nadležni organ će pravo iz stava (3) ovog člana uskratiti ukoliko je potrebno

zaštiti povjerljivost predmeta ili za pravilno vođenje postupka.

Član 26. (Saslušanje)

(1) Nadležni organ na svojoj sjednici saslušava okrivljenog ili čita njegovu pisano očitovanje po zahtjevu ili žalbi, koje je na zahtjev nadležnog organa okrivljeni dužan dostaviti u roku od sedam dana od dana prijema poziva za dostavljanje očitovanja.

(2) Ukoliko okrivljeni ne dostavi pisano očitovanje po zahtjevu ili žalbi u roku iz stava (1) ovog člana, smatraće se da je saslušan.

Član 27. (Okončanje postupaka)

(1) Postupak pred nadležnim organom se završava donošenjem odluke.

(2) Postupak pred nadležnim organom će se obustaviti ako se utvrdi da nema dokaza da je povreda Pravilnika počinjena.

(3) Ukoliko prvostepeni organ nije donio odluku po zahtjevu stranke u roku od 30 (trideset) dana po prijemu zahtjeva, nezadovoljna strana može izjaviti žalbu drugostepenom organu u roku od narednih osam dana, računajući od dana kad je trebalo biti odlučeno po podnesenoj žalbi.

Član 28. (Postupak pred drugostepenim organom)

(1) Drugostepeni organ će odbaciti žalbu kao neblagovremenu, nedopuštenu i nepotpunu ako je to propustio da uradi prvostepeni organ.

(2) Rješavajući o žalbi, drugostepeni organ može odluku prvostepenog organa potvrditi, preinačiti ili ukinuti.

(3) Drugostepeni organ će odbiti žalbu i potvrditi prvostepenu odluku kada utvrdi da ne postoje razlozi zbog kojih se odluka pobija ili da nema drugih razloga zbog kojih se odluka može ukinuti ili preinačiti.

(4) Drugostepeni organ će preinačiti prvostepenu odluku ako utvrdi da je proveden postupak iako su postojali razlozi za njegovo obustavljanje, ako utvrdi da je u prvostepenom postupku činjenično stanje pravilno utvrđeno, ali da se ima donijeti drugačija odluka ili ako nađe da postoje takve povrede pravilnika koje se mogu otkloniti bez ukidanja prvostepene odluke ili da nisu uzete u obzir okolnosti koje su od uticaja na pravilno donošenje odluke ili ako okolnosti, koje se uzete u obzir nisu pravilno ocjenjene, kao i kada nađe da je prvostepeni organ pogrešno ocjenio isprave i dokaze koje nije sam izveo, a odluku je zasnovao na tim dokazima.

(5) Drugostepeni organ će ukinuti prvostepenu odluku i predmet vratiti na ponovni postupak ako utvrdi da postoji povreda postupka koja je bila ili je mogla biti od uticaja na zakonito rješavanje pravne stvari ili ako nađe da zbog pogrešno i nepotpuno utvrđenog činjeničnog stanja treba provesti novi postupak.

(6) Drugostepeni organ će ukinuti prvostepenu odluku kada utvrdi da ju je donio stvarno nenadležni organ i predmet uputiti stvarno nadležnom organu.

(7) Prvostepeni organ kojem je predmet vraćen na ponovni postupak dužan je da izvede sve radnje i raspravi sva pitanja na koja je ukazao drugostepeni organ.

(8) Drugostepeni postupak mora biti okončan u roku od 30 (trideset) dana od dana prijema žalbe.

(9) Za vođenje sporova pred drugostepenim organom moraju se uplatiti takse. Uz zahtjev za rješavanje spora ili žalbu mora se priložiti i dokaz o plaćenju taksi u visini koja je utvrđena odlukom Izvršnog odbora NS/FS BiH ili odlukama entitetskih saveza.

(10) Ako taksa nije plaćena, podnositelj zahtjeva ili žalbe će se pozvati da istu uplati u roku od 48 (četrdesetosam) sati.

(11) Ukoliko u roku propisanom prethodnim stavom ovog člana podnositelj zahtjeva ili žalbe ne uplati taksu, zahtjev ili žalba će se odbaciti.

(12) Odluke drugostepenih organa su konačne i protiv istih žalba nije dopuštena.

Član 29.

(Primjena drugih pravilnika i propisa)

Na sva pitanja koja nisu regulisana ovih Pravilnikom, primjenjivat će se relevantne odredbe Aneksa 8 FIFA Pravilnika o statusu i transferu igrača.

Član 30.

(Obaveze koje proističu iz ovog Pravilnika)

Nadležni savezi su dužni da doslijedno primjenjuju odredbe ovog Pravilnika na trenere svih klubova, akademija i nogometnih/fudbalskih škola koji se takmiče u njihovoj organizaciji i da usklade svoje propise sa ovim Pravilnikom, najkasnije u roku od 60 (šezdeset) dana od dana stupanja na snagu ovog Pravilnika.

Član 31.

(Prelazne i završne odredbe)

(1) Ovaj Pravilnik stupa na snagu i primjenjuje se danom donošenja.

(2) Stupanjem na snagu ovog Pravilnika prestaje da važi Pravilnik o statusu trenera Nogometnog/Fudbalskog saveza Bosne i Hercegovine (novembar/studeni) 2021. godine.

PREDSJEDNIK
Vico Zeljković